



An Coimisiún  
Eorpach

# BUISÉAD AE DON TODHCHAÍ

#EUBudget #EURoad2Sibiu #FutureofEurope



30 Bealtaine 2018

## CISTE SÓISIALTA NA HEORPA PLUS AGUS AN CISTE EORPACH UM CHOIGEARTÚ DON DOMHANDÚ (CED)



### INFHEISTÍOCHT I NDAOINE

Chun an Eoraip a dhéanamh comhtháite, athléimneach agus iomaíoch san am atá le teacht, is gá infheistíocht a dhéanamh i ndaoine san am i láthair: san oideachais agus san oiliúint, ina gcuid scileanna, a gcuid infhostaitheachta, chomh maith leis an bpoitéinseal atá iontu gnólachtaí a chruthú agus nuálaíocht a dhéanamh, sin agus ina gcuid sláinte agus sna dálaí maireachtála atá acu trí chéile.

An infheistíocht a dhéanamh i ndaoine, agus an Eoraip a dhéanamh níos córa agus níos sóisialta, tá siad sin ar phríomh-thosaíochtaí an Choimisiúin reatha ón gcéad lá riamh. An uailmhian agus an gealltanais sin, is mar thoradh orthu a bunaíodh Colún Eorpach na gCeart Sóisialta, rud dar sprioc cearta sóisialta daingne agus nua a chur ar fáil do shaoránaigh an Aontais Eorpaigh.



### LEAGAN NUA FEABHSAITHE DE CHISTE SÓISIALTA NA HEORPA

Beidh Ciste Sóisialta Plus na hEorpa ar phríomh-ionstraim airgeadais an Aontais Eorpaigh le gné shóisialta na hEorpa a neartú, rud a dhéanfar ach an Colún a chur ag obair. Is éard atá ann an leagan 'nua feabhsaithe' de Chiste Sóisialta na hEorpa mar is ann dó faoi láthair.

- Déanfar na hacmhainní airgeadais a chur in áirithe do thosaíochtaí polaitiúla ríthábhachtacha agus do cheistean-na a bhíonn ag déanamh buartha do na saoránaigh:
  - Caithfear cláir agus tionscadail CSE+ a dhíriú ar dhúshláin a shaináithnítear faoin Seimeastar Eorpach i bhfianaise Cholún Eorpach na gCeart Sóisialta
  - Ballstáit a bhfuil líon mór daoine óga acu nach bhfuil fostaithe, agus gan iad sa chóras oideachais ná faoi oiliúint, beidh orthu ar a laghad 10% de mhaoiniú CSE+ a chur i leataobh do bhearta a thacóidh le fostaíocht don aos óg, agus le gníomhachtú an aosa óig
  - Is ceart do na Ballstáit ar a laghad 25% de mhaoiniú CSE+ a chur i dtreo mhaoiniú do bhearta a chothaíonn an cuimsiú sóisialta agus do na daoine is díothaí
- Féachfar chuige go mbeidh CSE+ níos comhleanúnaí agus níos comhlántaí le Cistí eile a bhíonn ag tacú le daoine, cistí mar Erasmus, an Ciste um Thearmann, Imirce agus Lánpháirtíocht, an Ciste Eorpach um Choigeartú don Domhandú, agus an Clár Tacaíochta um Athchóiriú Struchtúrach

## STRUCHTÚR AGUS BUISÉAD

Molann an Coimisiún buiséad iomlán **€101 BILLIÚN** i bpraghsanna reatha don tréimhse 2021–2027.

Is éard atá i gCiste Sóisialta Plus na hEorpa cónascadh na nithe seo: Ciste Sóisialta na hEorpa arb ann dó cheana, an Tionscnamh Fostaíochta don Aos Óg, an Ciste um Chabhair do na Daoine is Díothaí, Clár an Aontais Eorpaigh um Fhos-taíocht agus Nuálaíocht Shóisialta, agus Clár Sláinte an Aontais Eorpaigh. Seo thíos miondealú ar na codanna éagsúla:



Seo é an toradh a bheidh ar chónascadh na gcistí:

- Breis sineirgí agus breis comhlántachta a chruthú idir na cistí atá ann cheana
- Breis solúbthachta a chur sa tacaíocht airgeadais chun freagairt do dhúshláin eacnamaíochta agus shóisialta
- An clársceidealú agus an bhainistíocht a shimpliú, rud a laghdóidh an t-ualach riaracháin a bhíonn ar údaráis agus ar thairbhíthe



## AN CISTE EORPACH UM CHOIGEARTÚ DON DOMHANDÚ AGUS É NEARTAITHE

Is éard atá sa Chiste Eorpach um Choigeartú don Domhandú léiriú coincreiteach de dhlúthpháirtíocht an Aontais Eorpaigh i leith oibríthe Eorpacha a chaill a bpost. Is éard is sprioc don mhaoiniú ón gCiste Eorpach um Choigeartú don Domhandú feabhas a chur ar scileanna agus ar infhostaitheacht na n-oibríthe sin.

## STRUCHTÚR AGUS BUISÉAD

Beidh CSE fós ar cheann de na hionstraimí speisialta a chuireann ar chumas an Aontais gníomh a dhéanamh nuair a thagann cor sa chás gan choinne. Dá bhrí sin, ní cuid de huasteorainneacha buiséadacha an chreata airgeadais ilbhliantúil atá ann. **Molann an Coimisiún buiséad iomlán €1.6 BILLIÚN** i bpraghsanna reatha don tréimhse 2021–2027.

I láthair na huaire, is féidir le Ballstáit cúnamh a iarraidh ar an gCiste nuair is de dheasca athrú sna patrúin trádála dhomhanda atá poist á gcailliúint, nó nuair is í géarchéim airgeadais nó eacnamaíoch is cúis leis. D'fhonn deimhin a dhéanamh de go mbeidh an Ciste um Choigeartú don Domhandú i riocht freagairt d'athruithe ar mhargadh oibre an lae inniu agus an lae amárach, agus do dhúshláin eacnamaíochta, molann an Coimisiún na feabhsuithe seo a leanas:

- Cur leis an réimse cúiseanna ar féidir le Ballstát cur isteach ar chúnamh ón gCiste: cuir i gcás, ní amháin nuair a chuirtear oibríthe ó láthair de thoradh imeachtaí athstruchtúraithe a thagann ó athruithe sna patrúin trádála dhomhanda, ach freisin de bharr an uathoibríthe, an digitithe, nó an aistrithe go geilleagar ísealcharbóin
- Íslíú a chur ó 500 go 250 ar líon na n-oibríthe a briseadh as a bpost chun gur féidir iarratas a cheadú, rud is fearr léargas ar an méid a bhíonn i ngnólacht ar an meán sa lá atá inniu ann, agus ar a neamhghnáiche agus atá sé feasta líon an-mhór oibríthe a bhriseadh as a bpost le chéile
- Ach an ráta idirghabhála a ailíniú leis an ráta cómhaoineacháin CSE+ is airde sa Bhallstát lena mbaineann, spreagfar na Ballstáit le cur isteach ar airgead sa dóigh is éifeachtaí